

## Flerschem, wie werrde so schee

Omm letzde Sunndaach omm Stommdisch hott de Karl de Schorsch unn mich gefroocht: No ihr zwaa, ihr konnt joo nit uffs Grawestrooßefest kumme, weil ihr mett eierne Kameradschaft unnerweechs ward, awwer seider dann weenichsdens die letzde Daache mol dorsch die Grawestrooß gelaafe odder gefahrn? Was halder dann von der Strooß, iwver die mir uns so oft unnerhalle hawwe?

De Schorsch hottem als ersder Antwort gewwe: Karl, ich binse vorgestern mol dorschgelaafe unn ich muss saache, ich hädd nit gedenkt, dass die emol so werdd. Wirklich, die iss jetz richdisch schee worrn, mett dene Parkplätz so abwechselnd links unn rechts unn vor allem mett dene Beem, die butze die gonz Strooß.

Ich habb gegrinst. Wissder noch, wie merr uns iwver den Bus-Parkplatz vorm Rathenauplatz in die Woll kriecht hadde? Ob der bleiwe soll odder nit?

De Karl hott mich gestumpt. Du host joo immer gesaat, ess wär besser der det bleiwe, weil dann die Audos aach emol omm Bus odder omm Müllaudo vorbeikäme. Die hawwe uff dich geheert unn hawwen gelosse.

Ich habb de Karl gestumpt. Unn du host gemoont, beim Fassenachtszuch dete die Nann uff de Fahrzeuche alleweil von selbst ins Schunkele kumme, weil die Waache alsfort dene Schikane von de Strooß noochfahrn unn de Beem ausweiche missde.

Ja, sächt de Karl, awwer die Kurve die de fahrn musst mache die Grawestrooß ferr de Audoverkehr longsumer, ich denk ...

Häh, rieft de Schorsch, longsumer? Moonsde wirklich, ess det dort longsumer gefahrn werrn? Ja mir Alde fahrn longsumer, awwer vill von dene onnern unn vor allem die Laster, die rase doch weiter dorsch. Odder soon junge Kerl uffem Motorrad, der fiehlt sich doch wie im Wispertal unn schaukelt sich mett achtzich dorsch die Kurve.

De Karl hott mett de Achsele gezuckt. Dess werdd merr seh. Ich glaab, dass die Strooß so wiese jetz gebaut iss dess Schnellfahrn nit zulasse dut. Unn wenn gerast werdd muss halt ab unn zu geblitzt werrn, unn wenn die ersde mol so richdisch Strooß bezahlt hawwe, werrnse schunn ruhicher.

Flerschem, habb ich gesaat, wie werrde soo schee! Habbder eich emol die Plän vom Boeder-Gelände oogeguckt – Gallus-Kolonade soll dess haaße, awwer de heilige Gallus sollese dort ewecklosse – dess werdd gut, dess werdd e schee kloozentrum ...

De Schorsch hott schunn widder gerufe: Ja kloozentrum, awwer ohne Klo! Den will de Investor nit, weil doo det zuvill Babier geklaut werrn. Also ich konn doo nit hie wo ich doch dauernd pinkele muss.

Doo moont de Karl: Doo gehsde halt zum neie Rewe, der macht enn Klo, vorne in de Näh vom Oigong, wo jeder hiegeh kann.

De Schorsch hott nit uffgewwe. Die rechene jeden Daach mett e paar Dausend Kunde unn mache koon Klo – ich denk, dass mir Alde, weil mir joo aach nit immer mettem Audo hiefahrn, so was brauche. Aach missde unser Herr von de Stadt dem Rosco saache, dass nit jed Fraa, die ihr kloozentrum Kind wickele muss, gleich in die nächst Wertschaft gehe kann. Unn wenn so e jung Fraa mett Kind uffem Rewe-Klo iss, dann kann e onner Fraa devorstehe unn warte unn warte bis se ...

Losse merr, habb ich gesaat, awwer Flerschem werdd wirklich schee. Unn wenn dann uffem Axthelm-Gelände noch e Kultur-Scheier ferrs FAT unn die Gesongvereine gemacht werdd – ihr Leit, dann hawwe mir joo gar nix mehr ze krätsche. Eiern Honnes